



Fundacion Sinterklaas ta anuncia

Yegada di Sinterklaas

DURANTE un mainta ameno na Party Place na Wayaca, Fundacion Sinterklaas a organisa un conferencia di prensa pa trece e ultimo informacion tocante yegada di Sinterklaas.

Na prome lugá Fundacion Sinterklaas ta e grupo organisatorio cu pa e ultimo 4 aña nan a bin ta organisa e yegada di Sinterklaas. Durante e periodo aki e grupo organisatorio a cuminsa busca boluntario nan pa asina oficialmente funda Fundacion Sinterklaas cu tin bou di su encargo e organisacion completo di yegada di Sinterklaas. Fundacion Sinterklaas ta consisti di un grupo di

boluntario cu ta mantene loke ya ta parti di e cultura di Aruba, Sra. Eveline Frank, Sr. Robert Maduro y Sra. Maybeline Arends-Croes.

Durante conferencia di prensa a hiba palabra Sr. Robert Maduro cu a introduci e parti di e fundacion y tur su boluntarionan y tambe Sra. Deyanira Janssen-Frank cu a cubri e parti di e yegada di Sinterklaas.

Como tal Sinterklaas lo yega Aruba diadomingo 18 di november, 2012 na APA pa 11 di mainta. Saliendo for di APA e parada di Sinterklaas lo tuma e ruta di L.G. Smith Boulevard pa bay

direccion di bestuurskantoor na unda cu Fundacion Sinterklaas a organisa un fiesta di celebracion pa yama e homber santo bon bini. Durante e celebracion lo ta bay tin diferente gruponan di baile y di canto, show di modelahe, show cu e Piet nan mes lo prepara compañía tambe cu un bar y cushina, stand di cotton candy y popcorn y tambe Dino jumps y face painting. Fundacion Sinterklaas na mes momento a tuma e oportunidad pa gradici tur esnan cu ta haci e yegada y celebracion di Sinterklaas posibel, Marinier Kazerne, CCD, VNO, De Palm Tours, Party Animals, APA, DOW, Mete-

oro, Romar Trading, Nagico, The Party Place, Power 101.7, Rode Kruis y sin lubida tur e boluntario nan cu ta trahando incansablemente pa haci e aña aki yegada di Sinterklaas un biaha mas un exito. Fundacion Sinterklaas ta haci un yamada na e mayornan y e muchanan pa yama bon bini na Sinterklaas y tur e Piet nan cu lo yega Aruba diadomingo 18 di november pa 11 di mainta na APA, pa asina pueblo di Aruba pasa un rato ameno den compañía di famia. Pa mas informacion por e-mail na fundacion. sinterklaas@gmail.com of por bishita e pagina di facebook, 'Sinterklaas Aruba'.